

諸眾生等。同趣佛智。至涅槃城。

迴向已。歸命禮三寶。

### 第十補發願及端坐靜室稱念名號

五悔法門，別有發願，此經不說，蓋以勸請等三，即是願故。又行人脩此懺法，所求不同，或求律儀，或求定慧，或求往生淨土，或求現在安樂。今故鬪決，聽許補願，是在脩行者各自陳白，不容預擬成言也。然所求之願，雖各不同，須與四弘相合，不得增長生死。誠恐不知梗概，違背經宗，聊陳大意，以便行持。或用或否，任從決擇。

我弟子（□□）至心發願。願十方三寶。地藏慈尊。哀愍護持。救拔拯濟。令此國土。災亂消除。正法流通。咸生淨信。無諸障礙。永斷魔邪。我及眾生。重罪速滅。現離哀惱。充足資生。三聚戒根。畢竟清淨。二種觀道。應念現前。三昧總持。神通方便。四攝六度。無不圓成。了悟自心。一實境界。捨身此世。生在佛前。面奉彌陀。歷侍諸佛。親蒙授記。迴入塵勞。普會群迷。同歸秘藏。

發願已。歸命禮三寶。

自歸依佛 當願眾生 體解大道 發無上心

自歸依法 當願眾生 深入經藏 智慧如海

自歸依僧 當願眾生 統理大眾 一切無礙

和南聖眾